



Inatsisartunut ilaasortaq Anders Olsen, Siumut  
-/Maani

**§ 37 naapertorlugu apeqqummut nr. 2011-219-imut akissuteqaat Nanortalimmi pisortatigoortumik errorsisarfik**

02. december 2011  
Sagsnr. 2011-058007  
Dok. Nr. 775109

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Asasara Anders,

Nanortalimmi pisortatigoortumik errorsisarfip amigaatigineqarnera pillugu allakkannut qujanaq. Inoqutigii arlalit kuuinnartumik imeqannginnerat, aammalu errorsisarfimmik atuisinnaannginnerat saaffiginnissutinni aallaavigaat.

Aamma pisortatigoortumik errorsisarfip amigaatigineqarnera inuiaqatigiinni peqqissutsikkut pinaveersaartitsinermut nappaatinillu akiuiniarnermut sunniuteqartoq innersuussutigaat, tamatumunngalu atatillugu pingaartumik sakialluummik nappaateqartoqarnera innersuussutigalugu.

Nanortalimmi 2003-p kingorna sakialluummik nappaateqartut ukiumut sisamaniit 15-it akornanni amerlassuseqartut paasineqartarpuit, 2010-mi amerlanerpaasimallutik (15-iullutik). Kalaallit Nunaanni sakialluummik nappaateqarnerup errorsisarfimmillu atugassaqarnissamik periarfissaqarnerup imminnut ataqtiginnerat toqqaannartumik misissuiffingeqarsimangilaq. Taamatut misissuineq napparsimasut ikittuinnaat tunngavigalugit taamaallaat pisussaassaaq, amerlasuullu errorsiveqarmata tamanna kisitsositigut paasissutissat assigiinngissutaannik qularnaatsumik takutitsisinnaassanngilaq.

Kisiannili ineqarnermi pissutsit eqqiluissuserlu nappaatinut tuniluuttunut, taakkununngalu ilanngullugu sakialluummik pingaaruteqartorujussuusartut ilisimaneqarpoq. Nunani killerni nakorsaatit atorlugit katsorsaasarnerup saqqummernissaa sioqqullugu sakialluut annikillisinnaalereersimavoq, tassani ineqarnerup pitsaassusiata nerisaqarnerullu pitsangortinneqarnerat tunngaviorpiarsimalluni.

Allannguutini inuit peqqissusaannut pingaaruteqarnerpaasimasoq tassaavoq, "ineqarnermi pissutsinik pitsangorsaaneq, iluarsaassisarneq nioqqutissallu nerisassat isumannaassusiat" <sup>1</sup>. Aamma Kalaallit Nunaanni innuttaasut isumaginninnikkut atugarliornerusut akornanni TB-p eqquisinnaanera annertunerusarpoq. Inuit eqimattat akornanni uku eqquaanissamut ulorianartorsiornerusutut isumaqarfingeqarput: inuit nunaqarfinni najugaqartut, aammalu imermik kuuinnartumik atuisinnaanngitsut,

<sup>1</sup> Bjerregaard P: Kalaallit Nunaanni inuit peqqissusiat. Inussuk. Nunani issittuni ilisimatusarnermut nalunaarusiaq. Namminersorlutik Oqartussat 2004, qupp. 32

uffarfeqanngitsut kuutsittakkanillu perusuersartarfeganngitsut, inuit suliffeqanngitsut aammalu inuit tupamik imigassamillu annertuumik atuisuusut<sup>2</sup>.

Sakialluutip tuniluunneranut – matumani eqqiluisaarnermut atassusiisinnaaneq eqqartorneqartillugu – inuit eqqiluisaarerat pingaaruteqarnerpaasoq qularutigineqanngilaq. Sakialluut amerlanertigut quersornikkut, assak quorsorfigereerlugu assammissinikkut aammalu ataatsimut isignalugu qiseq aqqutigalugu toqqaannartumik atuinakkut tuniluuttarpoq. Aamma qiseq panersimasoq tuniluuffiusarpoq, sakialluutip bakteriaata panernini anigorsinnaammagu. Taamaattumik inuit eqqiluisaarsinnaanermut periarfissaqarluarerat, perusuersartarfinni pissutsit pitsaasuunerat aammalu atortunik taakkuninnga atuisinnaaneq tuniluuttoqarnissaanut akiuniarnermi pissarsiaqarnerpaaffiusussaapput.

Sakialluutip bakteriaa aatsaat 72 gradini kissarnerusumiluunniit minutini 15-ini uunnassimaartikaanni toqusinnaasoq ilisimaneqarpoq. Napparsimmavissuarni nappaatinik tuniluuttoqarnissaa pinngitsoortinniarlugu atisat 70 grader C-ni minutini 25-ni, imaluunniit 95 grader C-ni minutini qulini errorneqartarnissaat WHO-miit inassutigineqarpoq. Tassalu errorsiviit nalinginnaasut atorneqarnerat tuniluuttoqarsinnaaneranut annikillitsisarpoq, kisiannili nungutsitsisinnaanani.

Ilisimatitsissutigisinnaavara, Namminersorlutik Oqartussat Nanortalimmi errorsisarfutiminik matusineranut errorsisarfiup amigartoorteqarfiunera – aammalu amigartoorutit ineqarnermut artukkiinerat – pissutaammat.

Taamaattumik errorsisarfimmi maskiinat 2010-mi kommunimut neqeroorutigineqarput, tassanngaanniillu maskiinat 2010-mi tiguneqarput.

Sooq kommuni errorsisarfimmik ingerlatsinnginnersoq ilisimatinneqanngilanga.

Inussiarnersumik inuulluaqqusillunga

Jens B. Frederiksen

<sup>2</sup> Ladefoged et al. Risk factors for tuberculosis in Greenland: case-control study. Int J Tuberc Lung Dis 15(1):44-49)